



PUO KA EA TŠOERENG MOLEPO E LE MOOKAMELI OA SETSI
SA POKELLO EA LEKHETHO (LRA) ADV. REALEBOHA
MATHABA MOKETJANENG OA MOTSAMAO OA BOIPUSO -
THABA-BOSIU

03 LOETSE, 2016

HLOMPHO LE LITUMELISO

MOTLOTLEHI LETSIE LA BORARO;

MOTLOTLEHI MOFUMAHALI 'MASENATE BERENG SEEISO;

MOHLOMPHEHI TONAKHOLO, DR. PAKALITHA MOSISILI;

MOHLOMPHEHI MOOKAMELI OA NTLO EA SENATE;

MOHLOMPHEHI MOTSAMAI SI OA LIPUISANO KA NTLONG EA SECHABA;

MOHLOMPHEHI MOAHLOLI E MOHOLO KA LEKHOTLENG LE PHAHAMENG;

MOHLOMPHEHI MOTLATSI-OA TONAKHOLO;

BAHLOMPHEHI MATONA A KHABANE;

BAHLOMPHEHI BAAHLOLI BA LEKHOTLA LE PHAHAMENG;

EXCELLENCIES HEADS OF DIPLOMATIC MISSIONS AND HEADS OF
INTERNATIONAL ORGANISATIONS;

LITHO TSE KHABANE TSA NTLO EA SENATE, KA HO KHETHOLOHA
MORENA OA SEHLOHO OA THABA-BOSIU EO RE HATILENG MOBU O
TLASA BOLISA BA HAE;

BAHLOMPHEPHI LITHO TSA NTLO EA SECHABA;

MOHLOMPHEHI MONGOLI E MOHOLO OA 'MUSO;

BANGOLI BA BAHOLO BA MAKALA A MUSO;

LIOFISIRI TSE KHOLO TSA 'MUSO;

BAOKAMELI BA LITSI TSE IKEMETSENG LE TSA 'MUSO;

LIHLOOHO TSA LIKEREKE;

BAHLANKA BA SECHABA;

SECHABA KA KAKARETSO;

BANA;

BOMME LE BONTATE.

ke ema koano ho tla etsa puo e khutšoane ruri lebitsong la Setsi sa heso sa Pokello ea Lekhetho (LRA) e le motšehetsi oa motsamao ona o etsang nalane. Naha ea habo rona ea Lesotho e tsamaile leeto le lelelele la boipuso. Ha ke setsebi se ka lokolisang likatleho tseo re bileng le tsona kapa tsona liphephetso tseo re thulaneng le tsona leetong lena la rona la boipuso.

Ke rata feela ho supa hore rona ba LRA, se ileng sa re thokola hore re iphumane re tlameha ho kenya letsoho motsamaong ona oa boipuso, o supang leeto leo re le tsamaileng re le naha, ke hobane re tsoetsoe ke lona leeto lena le lelele leo re le ketekang kajeno. E hlile re tholoana ea boipuso ba Lesotho. Ka hona rena le koba bohali ketekelong e na.

Le ha ba bangata ba tseba mosebetsi oa rona oa mantlha ele oa ho bokella lekhetho, rona re tebisa maikutlo ha holoanyane ha re toloka thomo ea rona. Re sheba ka botebo sepheeo sa tšebetso ea rona, 'me re fumane hore bonnete mosebetsi oa rona ke oa ho fetola maphelo a sechaba sa habo rona kaha lichelete tsena tseo re li bokellang ho sechaba li reretsoe ho sebelisetsoa ho ntlafatsa bophelo ba sona. Ho bona hore sechaba sa

Basotho se ntlafetse le ho tsoelapele joale ka lichaba tse ling. Hara tse ngata, ketekelo ena ea boipuso e reretsoe ho re tlamahanya `moho, tje kaha re le "Chabana Sa Khomo", e leng ntho e bitsoang "NATION BUILDING" ka senkhoeche.

LRA e qalile tšebetso ka selemo sa 2003 ha Lesotho le ne le haba ho qeta lilemo tse mashome a mararo a metso e supileng le ipusa. `Me ke bontše hore hona selemong seo re ile ra atleha ho phahamisa pokello ka liperesente tse ka holimo ho mashome a mane (41%). `Me re bile le likatleho tse ngata ho tloha nakong eo, lipokello li `nile tsa phahama selemo le selemo, ho tloha ho 1.3billion ka 2003/04 ho fihlela 5.8billion ka 2015/16. Selemong sena re sebeletsa ho bokella 6.4 billion. Le ha hona le qholotso ea ho nyotobela ha moruo, re behile tsepo ea rona ho Molimo ho phetha thomo ea rona.

Ka hona, ha re lihlong ho ema le hona ho keteka jubilee ea boipuso ba Lesotho le sechaba kaha likatleho tsohle tseo re bileng le tsona ke ka lebaka la tšebelisano `moho eo re nang le eona le sechaba. Re lumela ka tieo ho lepetjo la rona le reng "*Re Sebeletsa Uena, Re Sebeletsa Sechaba*"! ke feela ha emong le emong oa rona a utluisisa

boikarabello ba hae `me a phetha tokelo ea hae naha ea Lesotho e ka tsoelang pele.

Ke tumelo ea ka e sa thekeseleng hore bohle re tseba bohlokoa ba khafa (TAX) eo re e lefang. Ke rata ho etsa boipiletso ke hona hore bohle ba boetapeleng re thusaneng `moho ho khotlaetsa sechaba ho lefa lekhetho ka boithaopo ka ho ba hlokomelisa bohlokoa ba lona, haholo nakong ena eo mokotla oa SACU o bonahalang o ntse o qepha, joale re tlameha ho phahamisa lipokello makhethong a lehae (domestic revenue).

Rona re le ba Setsi, re eme ka maoto ho akofisa mokhoa oa tšebetso, e ka ba malibohong le liofising, le ho ntlafatsa thuto ka tsa makhetho, `me ke feela ha kaofela re sebetsang `moho re ka tsebang ho aha Lesotho leo re le hlokanang le molemong oa meloko e tlang. "Mphemphe e'a lapisa molekane, motho o khonoe ke sa ntlo ea hae."

Ha re ntse re hetla morao ho keteka le ho leboha baholo ba rona, haholoholo mothei oa Sechaba sa Basotho, re kope bohlahe ho Molimo ho kena lipelong tsa rona, a re tlamahanye ho betla chebelopele `moho, `me a re fe likelello le mehopollo e mecha, ho lelekisa ka mafofolo chebelopele ea rona re le Sechaba.

Ke rata ho qetella ka ho leboha Lekala la tsa Lehae (Ministry of Home Affairs) ka ho re atamela le ho re hloaea re le ba bang ba ka sebetsang `moho le lona; bahlophisetsi ba mekete ea `Muso ka hore ebe re tsebile ho sebetsa `moho le bona tlotlisong ea boipuso ba naha ea habo rona; ke lebohe bohle ba nkileng karolo motsamaong ona, ha re beng sechaba se phetseng hantle, se atlehileng, re tsebe ho tsamaea leeto le tšoanang le lona lena ka selemo sa 2066, ha Lesotho le qeta lilemo tse lekholo (100) le ipusa! Kea tsepa re tla be re ntse re le `moho!

Molimo a boloke Lesotho le Basotho, kea leboha!!